

LESSON 1

*December 30 – January 5

Late Bangci Simding?



SABBATH NITAAK

Tu Kaalsung Simding: *1Khang. 16:7; Neh. 12:8, 18; Rom. 8:26, 27; Late 19; 25:1–5; 33:1–3; 82:8; 121:7.*

Kamngah: “Tua ciangin Zeisu in amaute kiangah, “Tu-a thupiang khempeuh pen note tawh kong omkhawm lai-a ka gengen thute mah ahi hi. Moses Thukham laibu sung, kamsangte laibu sung le Late sungah a kigelh thu khempeuh a tung ding ahi hi,” a ci hi. Tua ciangin Lai Siangtho sungthu a theih nadingun a lungsim uh honsak hi.” (*Luka 24:44, 45*).

A khang a khangin Jew le Khristian sungah thungetna le Pasian phatnate-ah Late Bu kilim zat mahmah hi. Late bu in Late laigelhpaa in Pasian tungah a pulaak thute hi mah taleh Late in mihingte kiang pan hong pai thute hi lo-in, Pasian kiang pan hong pai thute hi, ci-in i sang hi. Kha Siangtho humopna tawh a kigelh khia kammalte hi, ci-in i pom hi. Himah hi. Topa in Late gelhte bek tham lo-in Lai Siangtho gelh khempeuh zong Ama humopna tawh kigelh ahi hi (*2 Pet. 1:21*); Pasian in Late Bu tungtawnin eite hong hopih hi; Topa in Ama nasemte tungtawnin eite hong hopih den hi. Zeisu, sawltakte le Thukhun Thak a gelhte khempeuh bek thamlo-in Late gelhte tungtawnin a hong hopih hi (*Marka 12:10; Johan 10:34, 35; 13:18*). Amaute hong gelh khat thute in Pasian kammal hi-in, Piancile Romans bu bang mahin Late in zong Pasian kammal hi.

Late bu in nidang Israel mite Hebrew lakam tawh kigelh hi. Tua laite in amau nuntak khusakzia zong kilangsak hi. Amaute thu puak in leitung mi khempeuh ading hi. Late in Pasian kammal hi, ci-in sangin a hong hilh thute limtakin i ngaihsut ding kisam hi. Adiak diakin Hebrew lakam tawh kigelh ahih bang mahin tangthu piang, Pasian thuthuk le biakpiakna tawh kisai thute zong hong hilh tampi kimu thei hi. Tua thute in Late laigelhte hun bek thamlo-in amau hunkhit kum tul tampi khitciangin tuhun adingin thupuak hi, ci-in i sang hi.

*January 6, Sabbath a ding kiginkholhna in tu kaal lesson sim in.

Taanglai Israelte Biakpiakna sunga Late

Simin, 1 Khang. 16:7; Nehemiah 12:8; Late 18:1, 6; 30:1; 92:1; 95:2; 105:2; Kolose 3:16, le James 5:13. Bang thu piangte hangin Late hong kigelh khia hiam? Bang hunin Pasian mite in Late zang uh hiam?

Late in mimal biakpiakna hitaleh mihon biakpiakna-a zat dingin a hong kigelh ahi hi. Biakbuk sunga biakpiaknate-ah Pasian min phatna-in a kizang thute hi. Tumging tuamtuamte zangin (*Late 61:1*), awging tuamtuam (*Late 9:1*) le music makaiten zong Pasian min phatna dingin a kizang thute hi (*Late 8:1*).

Hebrew Lai Siangtho sungah LATE BU in “*tehilim*” “Pasian phatnate” ci-in kigelh hi. Hihin Late Bu mungtup a pulaak hong suakpah hi. Hihin Pasian phatna hi. Manglai tawh kigelhna-ah (*psalm cihpen*) Greek “*psalmoi*” zui-in kigelh hi. Hih laimal Septuagint sungah zong kizang hi (*Kum zalom nih le thum kikal sunga Greek tawh kigelh Thukhun Lui*).

Late Bu in Israelte biakpiakna-ah a peng thei lo laibu thupi mahmah khatin kiciamteh hi. Gentehna-in Late sung a thute in biakbuk apna, biakna pawite, pawi bawlante le Jerusalemah thuciamna singkuang kikoih ciangin zong a kizang thute hi. “*The Songs of Ascents*” (*Late 120–134*), biakna khualzinnate-ah kizang lasakna, Jerusalem zuanin a pai-na uhah a pai kawmkawmun a sak uh late hi; tua bangin kum khatin thum vei bang Jerusalemah va pai uh hi (*Pai. 23:14–17*). “*Egyptian Hallel*” (*Late 113–118*) le “*Great Hallel*” (*Late 136*) cihte in kum khatin pawipi thumte a kipan Kha Det pawi le biakbuk apnate-ah a kizang late hi. Egyptian Hallel in Paisan Pawi bawl tangin akizang pawi thupi mahmah khat hong suak hi.

Late 113 le 114 in Paisan pawi kipat annekkhopna-ah a kisa la hi. *Late 115–118* tawpna-ah (*Matt. 26:30*). “*Daily Hallel*” (*Late 145–150*) in nisim biakinn ah thungetna-ah a kizang thute hi. Tua Late in amaute biakpiakna-ah kizang bekthamlo-in, koi bangin zang uh hiam, cih thute zong hong hilh hi. Zeisu in a thungetna-ah hih Late mah zangin thu a ngen hi (*Late 22; Matt. 27:46*). Late in kum zalom khatlai pawlpite in zong biakpiakna-ah lim zat mahmah uh hi (*Kol. 3:16; Efe. 5:19*). Moses bawl biakbuk sungah biakpiakna i piak loh hangin i biakpiaknate-ah Late Bu i lim zat thei hi. Mimal biakpiakna ahi-a, mihon biakpiaknate-ah ahi zongin Late Bu i zangzang thei hi.

MONDAY January 1

Late Gelhpa tawh Kimuhna

Kumpi David in Late gelh ahihna Late Bu sungah kimu thei hi. Late in Israelte biakpiakna-ah a kizang mahmah thute hi. David in Israelte a namtui late gelhpa hi (*2 Sam. 23:1*). Thukhun Thak in Late Bu gelh in David hi, ci-in a pulaak hi (*Matt. 22:43–45; Sawl. 2:25–29, 34, 35; 4:25; Rom. 4:6–8*). Late sunga thu tampite in Levites mi tumging tuamtuam tumsiamte gelh hi, ci-in zong kimu thei hi. Gentehna-in *Late 50* le *Late 73–83* cihte in Asaph gelh hi, ci-in i thei hi. *Late 42, 14, 44–47, 49, 84, 85* le *88* cihte in Korah tate gelh hi. *Late 88* in ahihleh Ezrahit mi Heman gelh hi. *Late 89* in Ezrah mi Ethan gelh hi. Tualo Solomon gelh zong om hi (*Late 17, 72, 127*). Moses gelh zong kihel hi (*Late 90*); hihte banah mi dang tuamtuamte gelh Late zong om hi.

Simin, Late 25:1–5; 42:1; 75:1; 77:1; 84:1, 2; 88:1–3; le 89:1. Hihte in laigelhte tuakhak thute bang pulaak ciat uh hiam?

Kha Siangtho in Late gelhte humopna pia-in, amaute in Pasian kiang pan a ngah uh siamna, kivakna tuamtuamte Pasian nasepna ding le a mipihte adingin hong zangkhia uh hi. Late gelhte in biakpiakna le upna thu-ah upna kip upna kho a nei mite hi-in, zia-etna, lungkiat theihna tuamtuamte tungah zawhna a ngah thei uh hi. Late kigelh zawh kum tampi cing khin hi mah taleh tuhun tulai i nuntak khuasak zia ding thu tampi hong hilh thei veve hi.

“Ka thunugetnate nangma mai-ah hong kahto henla, na bil hong ngat in. Banghang hiam cihleh lunggimna tawh kidimin ka om a, ka nuntakna in sihna hankhuk naih khin hi” (*Late 88:2, 3*). Hih kahna thuumnate in kum 3000 val bang cingkhin himah taleh tuhun i nunzia adingin a kituak mahmah ngetna thuumnate hi, ci-in i thei hi.

Late kimkhat in hamsatna pulaak hi; Late kimkhat in nuamna pulaak hi. Late gelhte in tua bangin hamsatna a tuahtak uh ciangin Topa tungah kiko uh a, Topa in amaute hamsatna panin a honkhia hi. Amaute in ngah dingin kilawmlo himah taleh Pasian in amaute a hehpih veve hi. Amaute in Pasian vangliatna pulaak uh a, Ama cihtakna le hong itna pulaak tawntung hi. Amaute in Topa tungah citak dingin kamciam uh a, Ama itna sungah kalsuan in mainawt ding uh hi. Tuahi-in Late kimkhat in Pasian hehpihna le Ama sungah lametna thute pulaak hi; tua thute in Pasian hotkhiatna thu a kilangsak uh hi. Pasian a bel mite Amah in nusia ngeilo-in a tawntungin mit nauta bang in Topa in a kem hi. Amaute in Pasian kiang panin mawhmaisakna le nuntakna thak a khawngkhonin ngah thei uh hi. Tua himah taleh amaute in gimna hamsatnate tawh a kipelh tuan kei uh hi.

Late gelhte bangmahin gimna, lungkhamnate lakah koi bangin Topa tungah citak veve thei ding i hiam?

TUESDAY January 2

Hun Khempeuh ah Sakding La Khat

Simin, Late 3; 33:1–3; le 109:6–15. Late in mihingte phutkhak hamsatna tuamtuamte bang pulaak uh hiam?

Late in thu-um mite phutkhak nuamna gimna thute a pulaak hi. Tua bangin a tuahkhak thute om himah taleh amaute in Topa bia thei veve hi. Amaute nuntakna-ah a nuai-a thute kimu thei hi: (1) Pasian min phatna late in Pasian le Ama vangliatna, Ama minthanna a pulaak hi. Amah in na khempeuh piangsak ahihna, na khempeuhte tungah ukna nei ahihna bek tham lo-in a mite tungah a ciampel ngeilo ahihna pulaak hi. (2) Lungdamkohna Late in Pasian kiangpan hongpai thupha tampite pulaak hi. (3) Dahna thute in gimna sungpan Topa hotkhiat ding lunggulhna pulaak hi. (4) Pilna Late in midikte nuntak khuasakzia ding a lamlak hong suak hi. (5) Kumpi tawh kisai Late in Khrih a pulaak Late hi. Amah in ukna nei Kumpi, a mite a Honkhia Pa ahi hi. (6) Tangthu tawh kipawl Late in Israelte nuntakna-ah a beisa thute sungah Pasian cihtakna thute honghilh hi. A hong khangkhia ding khangthak te in Topa tungah citakin Ama kaihna a ngah thei uh hi.

Topa Pasian in a mite tungah a cihtakna le Topa bekmah muan ngamnate kimu thei hi. Late sunga lakamte in Pasian vangliatna lamdang in amaute a hotkhiatna thute zong kimuthei hi. Hebrew lakam tawh a kigelh Late bu in tu-in ei pau in kiteikhia himah taleh, i nuntakna-ah lam honglak thu tampi kimu thei hi. Tua bangin kammal nihwei thumvei kipulaakna ahangin honghilh nop thute thupit na honghilh hi. Kammal kibatpih tawh a kipulaakte in tua kammal thupitna honghilh hi. *Gentehma-in* “Ka kha aw Topa phat in; ka nuntakna khempeuh in Ama min siangtho pahtawi in” (*Late 103:1*). Hih sungah a kibang thu nih pulaak hi. “*ka kha*” cih kammal le “*ka nuntakna khempeuh*” cih kammal in a gen nopna kibang hi. Limciinna kammal zatte in a kimu theilo thute mitmuh theih bangin pulaak uh hi (*Gentehma-in* Pasian kiangah bukna mun, Ama kha nuai in eite bitna mun hi (*Late 17:8*). *Merism* cih kammal in a kibanglo thute etkak theih dingin hong hilh uh hi. “Zingsang khuavak mateng suunin zanin ka khituite luang hi,” cih thu in khawl hun omlo kapna a pulaak kammal hi (*Late 88:1*). Kammalte in Pasian tawh kizopna a pulaak kammalte mah hi, ci-in kimu thei hi. *Late 96:4, 5* in Hebrew tawh kigelhna-ah “*Elohim*” (pasiente); “*elilim*” cih kammal in “milimte” a pulaak hi. Hih bangin kammalte in minamte biak pasian tuamtuamte a pulaak bangin kingaihsun thei hi. A taktak in “*Selah*” cih kammal kigelh a, a khiatna in thukhat le thukhat kikaal-a om thute a pulaak kammal hi.

Humopna-ah Thungetnate

Simin, 2 Samuel 23:1, 2 le Rom 8:26, 27. Hihte in thungetna tawh kisai bang honghilh hiam?

Late sungah humopna tawh kidim Israelte thungetnate le Pasian min phatnate kimu thei hi. Late in Pasian hong hopihna le mihingte pulaak thute kigawmkhawm thute kimu thei hi. Late in Pasian tawh kizopna thute zong kimu thei hi. Late gelhpa in Pasian pen ama aituam bangin ngaihsun in “Ka Pasian” “Ka Topa” le “Ka Kumpipa” ci-in pulaak hi (*Late 5:2, 84:3*). Late laigelhte in Pasian kiangah “Na bil hong ngat in” ci-in thuum uh hi (*Late 5:1*), “Ka thungetna hongngai in” (*Late 39:12*), “Hong en in” (*Late 25:18*), “hong dawng in” (*Late 102:2*), “Hong honkhia in” (*Late 6:4*) ci-in pulaak uh hi (*Late 6:4*). Hih kammalte in Pasian tungah thungetna kammalte hi, ci-in i thei hi.

Late pulaak thungetnate Pasian minphatnate in etlawm mahmahin tua kammalte in Pasian Kammal mahin kiciamteh hi. Tua thungetna le Pasian min phatnate tungtawnin Pasian Kammal hong pai hi. Tua hi-in Late in Pasian tanu tapate khat le khat kizopna kip hi-in, *Rom 8:26, 27:7* sunga kigen bangin “Tua ahih manin eite bangzahin ginalo hitalehang eite a hong huh dingin Kha Siangtho a hong pai hi.

Eite in a kilawm bangin thunget ding nangawn i thei kei a, ahi zongin Kha Siangtho mah in tauna tawh eite a dingin a hong thumsak hi. Kha Siangtho in i thaneemnate-ah hong huh hi.” Zeisu in zong Late siksanin thu a hilh hi. *Luka 20:42, 43* in a pulaak bangin Zeisu in *Late 110:1* siksanin a hong hilhna thu i mu thei hi. Tu-in David mahmah in zong in ka to kumpipa tungah, “Na galte nangma khengakna-in ka bawl matengin ka taklamah tu in,” a ci hi. Late sung a thute in a piang khinsa thute pulaak hi mah taleh mailam hunah a hong tung ding thute zong a hong hilhna kimu thei hi. Israelte tuahkhak thute in tuhun mimal tuahkhak thute mah tawh kilamdang lo hi. Amaute tawh kibatlohma kampau, ngei-na, thu zuihna kibang lo hi mah taleh amauta tuah khak thute in tuhun i tuah khak thute mah hi. Tua hi-in Late sungah lametna, gimna, lau-na, dahna, Pasian min phatna, mi khempeuh in a tuahkhak thute kimu thei hi. Amau phukkhak thute a pulaakna-ah eite tuahkhak thute mah a pulaak uh hi, ci-in i pulaak thei hi.

Zeisu in Late sungah bang thu tawh kisai-in i upna thute pulaak hiam?

THURSDAY

January 4

Late Hunlai Thupiangte

Simin, Late 16:8; 44:8; 46:1; 47:1,5,7; 57:2; 62:8; 82:8; le 121:7. Late gelhte nuntakna-ah Pasian in bang dinmun nei hiam?

Late kigelhlai-in na khempeuh ah Pasian bekmah bulphuhin nungta uh hi; Topa tungah thungetna, Ama min phatna le Ama tungah kipiakna cihte kimuthei hi. Pasian in na khempeuh a Piangsak Pa bek thamlo-in na khempeuh tungah ukna a nei Pasian hi; Amah in vankhua-nuai khempeuh Kumpi le Thukhenpa hi. Amahin a tate kitangsapna khempeuh hongpia hi. Tua aihumanin Amah in a tawntungin muanhua hi. Pasian a langpangte in “Na Pasian koi-ah om hiam? ci-in hong zahko uh hi. Pasian kamciamte in maimang tawh kibangin na muh ciangin (*Late 42:10*), tua bangin kampau uh hi. Topa in Amite ompih tawntung hi. A tawpkhakna-ah Late in piansknate le mi khempeuh in Topa Pasian a biak ding hun pulaak hi (*Late 47:1; 64:9*).

Pasian bekmah thubulpi-in koih uh a, thu-um mite nuntakna-ah biakpiak na in a thubulpi khatin kipulaak hi. Bang hang hiam cihleh biakpiakna in Lai Siangtho ngei-na khat aihih bang mahin kuamah in nawlkhin theih thu hilo hi. Tua aihumanin na khempeuh ahoih hitaleh thusia hitaleh Pasian mite nuntak na-ah biakpiakna in akipelh theilo thu hongsuak hi. Biakpiakna sungah nuamna le dahna thute zong kimu thei hi. Pasian in Late laigelhte thuumnate a za hi. Koi mun koi mun panin amaute sapnate Topa in a dawnloh bangmah a omkei hi (*Late 3:4,13; 18:6, 20:6*). Late gelhte in, Pasian in vantungah om aihihna thu athei uh hi. Ahizongin Pasian in Zion ah zong om aihihna thu zong a pulaak uh hi; a mite lakah hong teeng aihihna thu zong a pulaak uh hi. Pasian in a mite tawh koimun koimun ah om taleng, a gamla a nai, a biakbuk sungah a mite tawh hong om Pasian hi (*Late 11:4*); A mite lakah kimulo himah taleh a hong omkhawm (*Late 10:1*) a hong kilaak Pasian hi (*Late 41:12*). Late Bu sungah hih thute kimu thei hi. Pasian vangliatna, hong ompihnate in a tuam tuamin kipulaak hi. Late gelhte in a mite tawh hong omkhawm, a kikhen theilo aihihna honghilh uh hi (*Late 24:7–10*). Late gelhte in Pasian vangliatna le Ama hong ompihna kilangdo himah taleh, i nuntakna-ah hih thu nih kimu tawntung thei hi. Amaute in Pasian hoihna thei uh hi. Bangbang i tuak ta zongin Pasian in hong ompih aihihna, amaute hamsatna panin Pasian hotkhiat na lamenin a om uh hi. Ama geel hun hong tun ciangin amaute in nopna a ngah thei uh hi.

Koi bangin Late in i tel zawh loh Pasian hong theisak hiam? Na nuntakna-ah Topa na mitsuan ding bang thu in hong khaktan hiam?

Ngaihsutbeh Ding: Ellen G. White, “*The Temple and Its Dedication*,” pp. 35–50, in *Prophets and Kings*; “*The Benefits of Music*,” pp. 291, 292, in *Messages to Young People* sung sim in.

Late Bu sungah a lian 150 om hi. Hih teng khempeuh pen khenpi 5 bangin kikhensuk hi. Bu I (*Late 1–41*), Bu II (*Late 42–72*), Bu III (*Late 73–89*), Bu IV (*Late 90–106*), and Bu V (*Late 107–150*), cih bangin kikhen hi. Hih khen 5te in Jew mite biakpiakna-ah a thupi mahmah hi-in biakpiaknate-ah la-in a sa uh hi. Jew ngei-na-ah hih khen 5te in Piancil pan Thuhilhkikna tawh tehkak theih dingin kibawl hi, ci-in sang uh hi. Late Bu in a omsa Phatna Late honkhat zangkik ahihna kimu thei hi: Korahite kaiikhopsate (*Late 42–49, 84, 85, 87, 88*); Asaphite kaiikhopte (*Late 73–83*), Ascents phatnate (*Late 120–134*), le Hallelujah Late ci-in kimu thei hi.

Late 111–118, 146–150. Late 72:20 in David phatna late a pulaak hi. Late a tam zaw pen Kumpi David in kumpi tokhom tungah a tut hun masa lai-a (*BC kum zalom 10*) a phuah late hi, cih kimu hi. Late bute in kum tampi sunga kigelh thute kum tampi sung mah kikaikhawm Laibu hong suak hi. Ahun in kumpite uk sung, saltangan om hun, kumpi gam kikhen hun, saltanna pan ciahkik hun cih bangin a hunin kikhen thei hi. Hebrew mipilte in Ezra uk hun sunga kigelh Late bute zong kiguang hi, ci uh hi.

Laithei mi kimkhat in Late Bu in Pasian humop na tawh kigelh hi, cihtu a sangthei kei-uh hi. Laitheite in Pasian sila, nasepte in Pasian lamlahna le makaihna vive hi (*Ezra 7:6, 10*). Pasian humop na le mihingte ngaihsutna kigawmkhawmin tua bangin Late Bu hong gelkhia uh hi. Tua thute in Khrih in mihing in hong pianna thu mah a pulaak hi. “Tua hi-in Lai Siangtho Bu in Pasian kiang pan hongpai thuman thute hong hilh hi. Tua hi-in Lai Siangtho thuman thute in Khrih nunzia tungtawnin hong kilangh hi. “THU in mihingin hong nungta-in eite lakah a hong nungta hi.” Ellen G. White, *The Great Controversy*, p. 8.2.

Kikupding Dotnate:

❶ Late in Pasian le mihingten Pasian phatna le thungetna kigawm khawm hi, cihtu in bang cihna hiding hiam? Ahi zongin koi bangin hihthu in telhak thu himah taleh Pasian in A mite tawh bangzahin kinai takin hong ompih cih pulaak hilo hiam? Mimal khat in Pasian tawh kinai takin hong ompih ahihna thu honghilh hilo hiam?

❷ Bang hunin Late Bu in na nuntakna hong lawngkha hiam? Na lawmte tawh kikum in. Bang lametna hong guan hiam?